

**UKA 2015/85: Uunga siunnersuut: Nioqqtissanik eqqussuineq annissuinerlu pillugit Inatsisartut inatsisaata allanngortinneqarneranik Inatsisartut inatsisaat nr. x, xXx 2015-imeersoq.**

**(Timmisartuutileqatigiiffiit ilaasui pillugit paasissutissat atortutigut elektroniskiusutigut taku-neqarsinnaanissaat kiisalu akitsuuserisut inunnik scannerillutik misissuisinnaanissaat)**

**pillugu**

**Inatsisinut Ataatsimiititaliap**

**ISUMALIUTISSIISSUTAA**

**Siunnersuutip aappassaaneerreqarnerani saqqummiunneqartoq**

Suliarinninnermini Inatsisinut Ataatsimiititaliap kingullertigut ukuninnga inuttaqarpoq:

Inatsisartunut ilaasortaq Anders Olsen, Siumut, Siulittaasoq

Inatsisartunut ilaasortaq Iddimanggiu Bianco, Inuit Ataqatigiit, Siulittaasup tullia

Inatsisartunut ilaasortaq Laura Tàunâjik, Siumut

Inatsisartunut ilaasortaq Múte Bourup Egede, Inuit Ataqatigiit

Inatsisartunut ilaasortaq Michael Rosing, Demokraatit

**1. Inatsisissatut siunnersuutip imarisai**

Siunnersuut nioqqtissanik tigussaasunillu allanik inatsisinik unioqquitsisumik eqqussuinerlik annissuinermillu nakkutilliinermi pingasutigut nukittorsaassaaq:

Timmisartumut ilaasunut nalunaarsuiffiit

Malittarisassat atuuttut ilaatigut timmisartuutileqatigiit pisussaaffilerpaat eqqussuineq annissuinerlu pillugit paasissutissanik akileraaruseriffiup nakkutilliinermi pisariaqartitaanik akileraaruseriffimmut tunniussinissaannik (nioqqtissanik eqqussuineq annissuinerlu pillugit Inatsisartut inatsisaanni § 29), tassani ilaatigut paasissutissat ilaasunut nassatanullu tunngassutillit pineqarlutik.

Danmarkimit nunanilluunniit allanit Kalaallit Nunaanni timmisartoqarfinnut angalasut ilaasuisa allattorsimaffinik Akileraartarnermut Aqutsisoqarfik ullut tamaasa tigusaqartarpoq. Angalanerup aallartinnginnerani nalunaarsuiffiit mailikkut tiguneqartarput.

Kisianniuna paasinarsisimasoq nalunaarsuiffiit kingusinnerusukkut allannguutitut naapertuuttunngorlugit iluarsiivigineqartarnerat tamatigut pisarsimanngitsaq, paasissutissanillu Akileraartarnermut Aqutsisoqarfimmit pisariaqartinneqartunik imaqartuaannanngitsut.

Taamaammat timmisartoqarfimmi billestinut/inniminniinernut nalunaarsuiffiit aqutigalugit ilaasut pillugit paasissutissanik piumasqaateqarsinnaanermut Akileraartarnermut Aqutsisoqarfik inatsisissatut siunnersuutikkut periarfissinneqassaaq. Peqatigisaanik Akileraartarnermut Aqutsisoqarfiup paasissutissanik attuumassuteqartunik pissarsinissaata tungaanut timmisartunik tikittunik uninngatitsisinnaanermut tunngavissiiisoqarpoq.

#### Timmisartumut ilaasut timaannik scannerilluni misissuineq

Malittarisassani atuuttuni (Nioqutissanik eqqussuineq annissuinerlu pillugit Inatsisartut inatsisaanni § 30, imm. 5) eqqussuinermit annissuinermillu nakkutilliinerup ilaatut Kalaallit Nunaannut/nnit angalasunik misissuisinnaanermut akileraaruseriffik piginnaatitaaffeqarpoq. Sapinngisamik mianersuussilluni misissuinerit pisassapput siunertamullu pisariaqartinneqartoq sinnerlugu misissuisoqartassanngilaq. Qaavatigut atisanit ilorpasinnerusunik misissuinerit aatsaat pisassapput pineqartup inatsisinik unioqutitsilluni tigussaasunik assigiinngitsunik timiminut toqqortaminik nassataqarnera ilimagissallugu tunngavissaqarluaraangat.

Timimik assaat atorlugit misissuisinnaanermut taarsiullugu timimik scannerut iluaqutigalugu misissuisinnaanerup eqqunneqarsinnaaneranut inatsisissatut siunnersuut tunngaviliissaaq. Timimut scannerut iluaqutigalugu misissuineq aatsaat pineqartup akuersineratigut pisinnaassaaq. Angalasoq timikkut scannerneqarnissamut akerliuppat timimik misissuineq assaat atorlugit pisariaqassaaq.

Soorlu tamanna assaat atorlugit timimik misissuisinnaanermut atuuttoq taamatuttaaq pineqartup inatsisinik unioqutitsisumik tigussaasunik assigiinngitsunik timiminut toqqortaminik nassataqarnera ilimagissallugu tunngavissaqarluarpat aatsaat timimik scannerineq pisinnaavoq.

#### Aningaasanik nassiussanik nakkutilliineq

Malittarisassani atuuttuni (nioqutissanik eqqussuineq annissuinerlu pillugit Inatsisartut inatsisaanni § 30, imm. 4) inuit Kalaallit Nunaannut/nnit angalasut 15.000 euronik amerlanerusunilluunniit naleqartunik nassataqartut tamanna pillugu akileraaruseriffimmut paasissutissiinissaannut pisussaaffilerpai.

Inunnut suliffeqarfinnut il.il. Kalaallit Nunaata avataanut 15.000 euronik amerlanerusunilluunniit naleqartunik nassiussisunut nunamilluunniit Kalaallit Nunaata avataaneersumit nassiussarsisunut tunngatillugu, taakkununga tamanna pillugu akileraaruseriffimmut paasissutissiinissamut pisussaaffik taamaattoq Inatsisissatut siunnersuummik eqqunneqassaaq.

## **1.2. Allanguutissatut siunnerasuut Naalackersuisunit saqqummiunneqartoq**

Siunnersuutip aappassaaneerutaasumik suliarineqarnissaanut allanguutissatut siunnersuummik, inatsisissatut siunnersuummut immikkoortumik allamik nutaamik ilanngussillutik, Naalackersuisut saqqummiussipput.

Allanguutissatut siunnersuutip nassatarissavaa, ininik pisatsersuutinillu akileraaruseriffiup usinik usingiarneqartunik usilersorneqartunilluunniit, taamatullu ilaasunik niusunik ikiartortunillu misissuiffissaanik umiarsualiviit timmisartoqarfiillu atugassiinissaannik akileraaruseriffiup piumasaqaateqarsinnaanera, tamanna akileraaruseriffimmut aningaasartuutaanngitsumik. Pisatsersuutinut piumasaqaatit misissuinerup ingerlanneqarsinnaaneranut pisariaqartuussapput. Assersuutigalugu ilaasunik nassiussanillu misissuinermut ininik pisariaqartinneqartunik atortulersukkamik atugassiisoqarnissaanik tamanna pisariaqarpat inassuteqaateqartoqarsinnaavoq imaluunniit usingiaaffinni usilersorfinnilu sumiiffinnik assersukkanik atugassiisoqarnissaanik.

Talittarfiit mittarfiillu piumasaqaatinik taaneqartunik naammassinnissinnaanngippata, nioqqutissanik usingiaaneq usilersornerlu taamatuttaaq ilaasussanik ikisoqarsinnaanera ilaasunillu niusoqarsinnaanera akileraaruseriffiup inerteqqutigisinnaavaa.

Allanguutissatut siunnersuutip inuussutissarsiutinik ingerlatsisunut pisortanullu aningaasaqarnikkut allaffissornikkullu kinguneqarnissai pillugit nassuiaateqaqqullugit Naalackersuisut Inatsisinut Ataatsimiititaliamit qinnuigineqarnikuupput.

Umiarsualiviit ininik taamaallaat misissuineranut ataavartumik atugassanik atugassiinissaat siunnersuutip tunngaviatigut siunertarinngikkaa Naalackersuisut akissuteqaamminni oqaatigaat. Siunertaasorli tassaavoq akileraaruseriffiup piffissani misissuinissamik pisariaqartitsiffiusuni ininik, sumiiffimmut usit ilaasulluunniit nunamut niuneqarfiannut qanittumiittumik atugassinneqarnissaa. Init piffissani allani siunertanut allanut umiarsualiviup aalajangersagaanut nalinginnaasumik atorneqarsinnaassapput.

Taamaattumik misissuisarnissaq siunertaralugu ininik atugassiineranut aningaasartuutaasussat ikittuinnaasussat Naalackersuisunit nalilerneqarput.

## **2. Tusarniaaneq**

Inatsimmut nassuiaatini nalinginnaasuni immikkoortoq 8-mi nassuiaatigineqarpoq, inatsisissatut siunnersuut oqartussaasunut kattuffinnut il.il. ukuusunut tusarniaassutigineqarsimasoq:

*KANUKOKA, Kalaallit Nunaanni Sulisitsisut Peqatigiiffiat (GA), NUSUKA, S.I.K., KNAPK, KPMG Grønland, Deloitte, Grønlands Revisionskontor, Aalisarnermut, Piniarnermut Nunalerinermullu Naalakkersuisoqarfik, Inuussutissarsiornermut, Aatsitassaqarmut Suliffeqarnermullu Naalakkersuisoqarfik aamma Kalaallit Nunaanni Politimestereqarfik.*

Aamma inatsisissatut siunnersuut Naalakkersuisut nittartakkakut tusarniaavianni tamanut saqqummiunneqarpoq.

Inatsisinut Ataatsimiititaliap kaammattuinera malillugu inatsisissatut siunnersuut allannguutissatullu siunnersuut pillugit Mittarfeqarfiit timmisartuutileqatigiiffiillu Kalaallit Nunaanni timmisartuussisartut Naalakkersuisunit tapiliussamik tusarniaavigineqarput.

Tamatuma malitsigisaanik Naalakkersuisut allakkiamik ataatsimiititaliamut nassiuusaqarput, tassani nassuiaatigineqarluni tusarniaanermut akissutit tiguneqarsimasut Naalakkersuisullu taakkununga oqaaseqaataat ilanngullugit. Tusarniaaneq pillugu allakkiaq isumaliutissiisummut ilanngussaq 5-itut ilanngunneqarpoq.

Inatsisissatut siunnersuutip aappassaaneerutaasumik suliarineqarnissaanut Naalakkersuisut allannguutissatut siunnersuummik saqqummiussipput. Naalakkersuisut Inatsisinut Ataatsimiititaliamut akissuteqaamminni paasissutissiipput allannguutissatut siunnersuut tuaviussamik tusarniaassutigineqarsimasoq. Tusarniaanermilu Inuussutissarsiornermut, Suliffeqarnermut Niuernermullu Naalakkersuisoqarfik, Sulisitsisut (siusinnerusukku Kalaallit Nunaanni Sulisitsisut Peqatigiiffiat), Naalakkersuisut Siulittaasuata Naalakkersuisoqarfia, Aatsitassanut Ikummatissanullu Naalakkersuisoqarfik, KNAPK aamma Ineqarnermut Sanaartornermut Attaveqarnermullu Naalakkersuisoqarfik tusarniaanermut akissuteqarsimasut.

Ataatsimiititaliap maluginiarpaa allannguutissatut siunnersuutip (minnerpaamik tusarniarneqartunut marlunnut) ulluni 23. aamma 24. marts tusarniaassutigalugu nassiuunneqarsimasoq kingusinnerpaamik akissuteqarnissamut killiliullugu ulloq 25. marts nal. 12.00. Tamannalu tusarniaanermi akissuteqarnissamut piffissaliinertut sivikitsutut (oqarusunnarporluunniit sivikippallaarujussuartutut) ataatsimiititaliamit nalilerneqarpoq.

Allannguutissatut siunnersuummut nassuiaatini tusarniaanermi akissuteqaatit pillugit nassuiaateqartoqanngilaq, tamannalu Inatsisinut Ataatsimiititaliamit ajuusaarnartinneqarpoq.

Taamaamat Inatsisartut tunngavissaqarlualutik aalajangiisinaanissaat isumannaarniarlugu tusarniaanermi akissutit assilinerinik ataatsimiititaliaq pissarsiniartariaqarsimavoq. Taakku imarisaat pillugit ataatsimiititaliaq ataani nassuiaateqassaaq:

- KNAPK-p allannguutissatut siunnersuut tapersorsorpaa.
- Aatsitassanut Naalackersuisoqarfik allannguutissatut siunnersuummut imaaliiallaannaq oqaaseqaatissaqanngilaq, taamaattorli allannguutissatut siunnersuutip talittarfinnut aatsitassarsiornermi suliniutinut attuumassuteqartunut sunniuteqarsinnaanerani ilanngutsinneqarumavoq.
- Siulittaasup Naalackersuisoqarfia taamaallaat inatsisissamik piareersateqarnermut tunngassuteqartunik oqaaseqaatissaqarpoq.
- Sulisitsisut (Grønlands Erhverv) § 32 a, imm. 1-imi oqaasertaliinerup allanngortinneqarnissaa kaammattuutigaa. Aalajangersakkap oqaasertalerneqarnera naapertorlugu Akileraaruseriffik umiarsualiviit timmisartoqarfiillu “sananeqarneranni pisat-sersorneqarnerannilu” immikkut ittunik piumasaqaateqarsinnaatitaavoq. Sulisitsisut (Grønlands Erhverv) isumaqarput akileraaruseriffik umiarsualivinni timmisartoqarfinnilu ininut akileraaruseriffimmit misissuineranut atorneqartussanut taamaallaat piumasaqaateqarsinnaasoq aalajangersakkap oqaasertalerneqarnerani ersittariaqartoq.

*§ 32 a, imm. 1-imut tunngatillugu Naalackersuisut kaammattuut malissimannngikkaat Inatsisinut Ataatsimiititaliap paasivaa, taamaattorli inatsimmut nassuiaatini ima allassimasoqartoq:*

*Piumasaqaatit ininut pisatsersuinernullu misissuinissap isumagineqarnissaanut pisariaqartunut tunngasuupput, misissuinissallu siunertaanik naammassinninnissamut piumasaqaataasunit annertunerusinnaanatik. Tassunga atatillugu erseqqissarneqarpoq ininut akileraaruseriffiup pitsaasumik misissuinissaanut atugassat nassiussanik ilaasunilluunniit nunamut niusiffiusup angallammulluunniit ikisiffiusup eqqaaniinnissaat qanittunnguaniinnissaalluunniit akileraaruseriffiup taamaallaat peqqussutigisinnaammagu. Akileraaruseriffik umiarsualivinni timmisartoqarfinniluunniit ingerlatat illuutilluunniit qanoq sanaartorneqarnissaannut pisatsersorneqarnissaannulluunniit aalajangiisuunngilaq.*

Siunnersuut malillugu ininik pisatsersuinissamut akileraaruseriffiup piumasaqaataata naammassineqarnissaanut tunngatillugu aningaasartuutit talittarfinnut timmisartoqarfinmillu pineqartumit isumagineqartussaasut Sulisitsisut (Grønlands Erhverv) maluginiarpaat. Sulisitsisut (Grønlands Erhverv) isumaqarput aningaasartuutit pisortanit

isumagineqartariaqartut. Tassunga atatillugu aamma Umiarsualiviit timmisartoqarfiillu ataasiakkaat ataqatigiissaagaanikkut assigiinngitsuusut, taamaammallu aaqqissuussinissamut akileraaruseriffiup piumasaqaataanik naammassinninniarneq taakkununga assigiinngisitaarsinnaasoq Sulisitsisunit tikkuarneqarpoq.

*Kaammattuut Naalackersuisunit malinneqarsimanngitsoq Inatsisinut Ataatsimiititaliap paasivaa.*

- Allanguutissatut siunnersuutip taamak nukingiunneqartigisumik saqqummiunneqarnera Ineqarnermut, Sanaartornermut, Attaveqatigiinnermullu Naalackersuisoqarfimmit isumakulunnartinneqaqaaq, paasineqarlunilu allanguutissatut siunnersuutip annertussusianut kiisalu qitiusumik aqutsisoqarfimmut, innuttaasunut suliffeqarfinnullu attuumassuteqartunut kingunerisinnaasaanut naleqqiullugu tusarniaassummut akissuteqarnissamut piffissaliussap tulluannginera.

Allanguutissatut siunnersuut umiarsualiivinni mittarfinnilu atuisunit tamakkiisumik akiliisitsisoqartalernissaanik tunngaveqartoq Naalackersuisoqarfimmit uparuarneqarpoq, tamannalu Naalackersuisoqarfimmit piviusorsioruorsineqanngilaq. Naalackersuisoqarfik taamaammatt naliliivoq umiarsualivinni timmisartoqarfinnilu akileraaruseriffiup piumasaqaataanut naapertuuttumik aaqqissuussinissat Nunatta Karsianit matussusertariaqarnissaat ilimanartorujussuusoq.

Naalackersuisoqarfilli paasitinneqarsimavoq periutsumik atuutereersumik malittarisassiuussinissaq allanguutissatut siunnersuummik siunertaasoq. Tamatuma inatsimmut nassuiaatinut ilanngunneqarnissaa Naalackersuisoqarfimmit inassutigineqarpoq, taamaaliornikkut Naalackersuisoqarfiup allanguutissatut siunnersuummut tunngatillugu isumakulunnartitaata ilaat piareersimaffigineqassalluni.

*Siunnersuutip periuseq atorneqareersoq erseqqissarniaraa inatsimmut nassuiaatini ilanngunneqarsimasooq Inatsisinut Ataatsimiititaliap paasivaa, taamaakkaluartorli inatsimmut nassuiaatini suli allassimavoq umiarsualiviit timmisartoqarfiillu aningaasartuut naggataatigut atuisunit matussusertissagaat.*

### **3. Paasissutissat tapiliussat**

Inatsisinut Ataatsimiititaliaq allakkatigut 26. marts 2015-imeersutigut inatsisissatut siunnersuummut tunngatillugu Naalackersuisunut arlalinnik apeqquteqarpoq. Assaat atorlugit misissuinnermut taarsiullugu timimik scannerummik iluaquserluni ilaasunik Kalaallit Nunaannut/nnit angalasunik misissuisinnaanermut siunnersuutip tunngavissiineranut apeqqutit ingammik tunngassuteqarput.

Ataatsimiititaliap Naalakkersuisut akissutaat allannguutissatullu siunnersuut piffissap ingerlanerani Naalakkersuisunit saqqummiunneqartoq tunngavigalugit ulloq 14. april tapiutaasumik arlalinnik apeqquteqarpoq.

Ataatsimiititaliap apeqqutai Naalakkersuisullu akissutaat isumaliutissiisummut ilanngussaq 1-itut 2-tullu kiisalu 3-tut 4-tullu kakkiunneqarput.

Kiisalu Inatsisinut Ataatsimiititaliap Aningaasaqarnermut Aatsitassanullu Naalakkersuisoq ulloq 8. maj siunersiorpaa. Siunersiuinermi apeqqutit Naalakkersuisullu oqaaseqaatai isumaliutissiisummut ilanngussaq 7-itut 8-tullu ilanngunneqarput.

### **3.1. Nakkutilliinikkut sunniutit – Timimik scannerineq**

Inatsisinut Ataatsimiititaliap Naalakkersuisut aperivai scanneri pissarsiariniarlugu isumaliutigineqartoq taamaallaat atisat ikerinut toqqukkanik qulaajaasinnaasuunersoq imaluunniit tigussaasunik timip sulluinut toqqukkanik aamma takunnissinnaasuunersoq ikiaroonartumillu eqqusseriaraluartut paasineqarnissaannut atorneqarsinnaanerusuunersoq.

Naalakkersuisut akissummini paasissutissiipput, timi tamakkerlugu scannerummik, timip ikianut toqqorneqarsimasunik takunnissinnaasumik pisinissaq Naalakkersuisunit kissaatigineqartoq.

### **3.2. Angalasut ulluinnarni inuunerisa paqumisinneqarnissamullu illersugaanissaat eqqarsaatigalugu –Timimik scannerineq**

Timimut scannerutit ilaat (scannerutit milimeterikkaartunik maligaasiortut aamma backscatter-røntgen atorlugu scannerutit) inuk scannerneqartoq ersernerlungajattumik “aliortugarpalaartumik” nuisittarpaat. Aamma timip pisatai takuneqarsinnaasarput. Tamanna kanngunartutut paquminartutullu misigineqarsinnaasarpoq.

Taamaattorli qarasaasiakkut atortulersuutinik ilisarnarunnaarsaatinik assigiinngitsunik ineriartortitsisoqarsimavoq, assersuutigalugu inuup scannerneqartup kiinaa ilisarnarunnaarsinneqarsinnaavoq, scannerut taamaallaat inuup timaani toqqortarineqartunik takutitsisinnaasunngorlugu atortulersugaq Amsterdamimi atorneqarsimavoq. Ataatsimiititaliap paasinninnera malillugu EU-mi angalasut ulluinnarni inuunerisa illersorneqarnerat assigiinngitsunik malittarisassiornikkut isumannaarneqarsimavoq,

Naalakkersuisulliuku paasissutissiisutigigaat timimut scannerut pisiariniarlugu isumaliutigineqartoq milimeterbølge atorlugu scannerutaanngitsoq imaluunniit backscatter-røntgen atorlugu scannerutaanngitsoq.

Inatsisinut Ataatsimiititaliap tamanna tunngavigalugu Naalakkersuisut uppersaqqullugit qinnuigai ilumut timimut scannerutip Naalakkersuisunit pissarsiarissallugu

isumaliutigineqartup scannerneqartumut kanngunarsinnaasumik paquminarsinnaasumillu timip atortui nuisittassanngikkai, taamaammallu taassuma ilisarnarunnaarsaatini atortulersuusernissaa angalasullu ulluinnarni inuunerisa illersorneqarnissaat pillugu maleruagassanik atuutsilersitsinissaq pisariaqanngitsut nalilerneqartut.

Naalakkersuisut uppersarparaat, scannerut Naalakkersuisut pisiassamissut eqqarsaatigisaat ima sukumiitigisumik takutitsinnaanngitsoq, allaat inuup scannerneqartup kanngunarsagaasut misiginissaanut Naalakkersuisut naliliinerat naapertorlugu pissutissaqassanani.

Naalakkersuisut naliliinerat malillugu timip ilaanik takutinneqartariaqanngitsunik, soorlu timip atortui ilisarnarunnaarsarlugit allatulluunnit illersorlugit ilisarnarunnaarsaatini atuinissaq misissuinerup pitsaassusissaanik siunertaanillu annikillitsissaaq.

Angalasut ulluinnarni inuunerisa illersorneqarnissaanut tunngatillugu Naalakkersuisut paasissutissiissutigaat Københavnip timmisartoqarfiani inunnik scannerutip atornissaanut ilitsersuut naapertorlugu nakkutilliisutut suleqataasoq angalasutut suaassusilik taamaallaat angalasup assingini misissuisinnaasoq. Inunnik scannerutip atulerneqarnissaanut atatillugu timmisartoqarfimmi sulisut atuinissamik ilinniartinneqarneranni ilitsersuutini maleruagassat taamaattut ilanngunneqarnissaat<sup>1</sup> Naalakkersuisut qulakkeerniarpaat.

### **3.3. Peqqinnissakkut sunniutit – Timimik scannerineq**

Inatsisinut Ataatsimiititaliaq Naalakkersuisunut apeqquteqarpoq Inuiaqatigiinni innuttaaqateqarnerisugut røntgen atorlugu scannerneqarnermi peqqinnissakkut ulorianartorsiortinneqarsinnaasunik, taamaattoqarpallu taakku illersorniarlugit Naalakkersuisut malittarisassanik sunik atuutsilersitsiniarnersut.

Naalakkersuisut akissutitut ima paasissutissiipput:

*Naartusunik meeqqanillu 15-it inorlugit ukiulinnik scannerinissaq Københavnip timmisartoqarfiani inunnik scannerutip atornissaanut ilitsersuut naapertorlugu inerteqqutaavoq.*

*Maleruagassat taamaattut inunnik scannerutip atulerneqarnissaanut atatillugu ilitsersuutini, timmisartoqarfimmi sulisut atuinissamik ilinniartinneqarneranni ilanngunneqarnissaat Naalakkersuisut qulakkiissavaat.*

Malitsigisaanik Inatsisinut Ataatsimiititaliap apeqqutigaa meeqqat naartusullu saniatigut inoqarnerisugut røntgen atorlugu scannerneqarnikkut immikkut peqqinnissakkut

<sup>1</sup> Inatsimmi atuuttumi § 30, imm. 5, oqaaseqatigiit kingulliit tamatuma malereerunarpaa.



ulorianartorsiortinneqarsinnaasunik, tassani assersuutigalugu aamma kræftimik eqqorneqarsimasut katsorsartikkiartorlutik katsorsartereerlutillu angalasut.

Angalasut misissorneqarnissamut toqqarneqartut scannerneqarnissaminnik akuersinnginnerminni scannertinnerup sunik ulorianaateqarsinnaaneramik erseqqissumik ilisimatinneqartassasut Naalakkersuisut akissuteqaamminni oqaatigaat. Nappaatinillu aalajangersimasunik nappaateqarnermi timimik scannerutip atorneqarnissaa inassutigineqanngippat tamanna ilitsersuutini, ilitsersuutit Danmarkimi atorneqartut naapertorlugit suliarineqartussani, allassimajumaartoq.

Naalakkersuisulli oqaatigivaat timimik scannerutit peqqissutsimut – tassa angalasup sulisulluunniit scannerummik atuisut peqqissusiannut - ulorianartorsiortitsisinnaannginnissaat siunertaasoq. Tamannalu neqeroorutitik suliaqarnermut atatillugu piumasaqaatit erseqqissarneqarneranni ilanngunneqarumaartoq.

Nangillugulu Inatsisinut Ataatsimiititaliap Naalakkersuisut aperivai, Peqqinnissaq eqqarsaatigalugu mianersuutassat, suliffimmi avatangiisit eqqarsaatigalugit mianersuutassat mianersuutassallu allat assingusut eqqarsaatigalugit, peqqinnissaqarfimmi røntgen atorlugu atortulersuutitik atuinermut malittarisassanik atuuttoqarnera assigalugu timmisartoqarfimmi ilaasunut scannerutit atorneqarneri malittarisassanik nassataqartussaasutut Naalakkersuisunit nalilerneqarnersoq.

Nalakkersuisut ima akippat, Scannerummik atuinermi maleruagassanik, assersuutigalugu Københavnip timmisartoqarfiani inunnik scannerutip atornissaanut ilitsersuutit assinganik suliaqartoqartariaqartoq Naalakkersuisut naliliisut.

Naalakkersuisut akissutaat Inatsisinut Ataatsimiititaliap ima paasivaa, tassa peqqinnissakkut mianersuussinissap suliffimmilu avatangiisini mianersuussinissap isumaginissaanut qanoq atuinissamik ilitsersuut naammattutut Naalakkersuisunit nalilerneqartoq, taamaalillunilu røntgen atorlugu peqqinnissaqarfinni nappaatinik suussusersiniutit pillugit nalunaarutip assinganik assersuutigalugu røntgen atorlugu atortulersuutit akuerineqarnissaannut, qinguartaasarfiit assersorneqarnissaannut ukiumoortumillu atortulersuutit misissorneqartarnissaannut malittarisassanik aalajangersaasoqarnissaa Naalakkersuisut paasinninnerat malillugu pisariaqanngitsaq.

Tamanna ataatsimiititaliap tusaatissatut tiguaa. Ataatsimiititaliilliuna paasinninnera malillugu Københavnimi timmisartoqarfimmi røntgen atorlugu scannerut (qanoq atorneqarnissaanut ilitsersuutaatata saniatigut) røntgen atorlugu atortulersuutitut danskit nalunaarutaannut ilaatinneqartoq – Kalaallilli Nunaannut atuutinneqanngitsumut taamaalillunilu røntgenscannerumut Kangerlussuarmi timmisartoqarfimmi atorneqartussatut

pisariniarneqartumut. Naalakkersuisut ajornartorsiummik taassuminnga eqiingaffiginninnissaat isumannaassallugu Ataatsimiititaliamit pingaartinneqarpoq.

Naalakkersuisut tamatuma malittuanik qinngornerit ioninngortitsisartut pillugit aamma qinngornernut illersuuteqarnissaq pillugu Inatsisartut Inatsisaannut siunnersuummik saqummiussisimasut Inatsisinut Ataatsimiititaliap paasivaa (UKA2015/17).

### **3.4. Inunnik røntgen atorlugu scannerneqaqqusaanngitsunik røntgeniluunniit atorlugu scannerneqarnissamik kissaateqanngitsunik misissuineq**

Inuit tunngavissaqartumik pasineqartut malittarisassalli Naalakkersuisunit aalajangersarneqartut malillugit timimut scannerut atorlugu misissorneqarsinnaanngitsut (tassani soorlu naartusut meeqqallu 15-it inorlugit ukiullit) qanoq iliorluni misissorneqartarnissaat pillugu Inatsisinut Ataatsimiititaliap Naalakkersuisut aperinikuuvai.

Naalakkersuisut akissutitut ima paasissutissiipput:

*Angalasup timimigut scannerneqarnissani itigartippagu, scannerneqarnissaaluunniit malittarisassat naapertorlugit inassutigineqanngippaat, taava angalasoq pisarneq malillugu timimigut misissorneqassaaq, pasitsaanneqarneralu aalajangiusimaneqarpat politiinut tunniunneqassalluni, napparsimmavimmi scannertinneqarnissaa imaluunniit perusuersartarfiliaanneqarnissaa siunertaralugu.*

### **3.5. Meeqqat illersugaanerat**

Naalakkersuisut meeqqat 15-it inorlugit ukiullit scannerut atorlugu misissorneqarsinnaannginnissaannut malittarisassanik aalajangersaanissartik siunertarigaat Naalakkersuisut paasissutissiissutigat (soorlu tamanna imm. 3.3-mi taaneqartoq).

Malittarisassap taamaattup atuutsilersinneqarnera, ikiaroorartumik eqqussuisut siunissami siunertarineqartumut uniuistsisumik meeqqanik ikiaroorartumik eqqussuisutut atuinissamut ussarnartorsiulersinnaanerannik nassataqarsinnaanera pillugu Inatsisinut Ataatsimiititaliap Naalakkersuisut aperinikuuvai.

Naalakkersuisut akissutaanni, kiisalu siunersiuinermi itisiliilluni paasissutissiinermi erserpoq, ukiutigut killiliussassatut eqqarsaatigineqartup kingunerisaanik meeqqat ikiaroorartunik eqqussuinerme atorineqarsinnaanerat Naalakkersuisut ilimaginngikkaat. Pasinninnissamut tunngavissaqartillugu meeqqat maannakkutut pisarneq malillugu misissorneqartassapput. Taamaalilluni paasisaaratarsinnaanerup ilimanarnera allannguuteqanngilaq.

Tunngavissaqartumik pasinnittoqartillugu aatsaat aamma inersimasut misissortinnissamut illuartinneqassapput, misissuinerlu aatsaat scannerut atorlugu pissaaq inersimasoq pineqartoq tamatumunnga akuersippat. Taamaammat ilimagineqanngilaq siunnersuutip nassatarisaanik meeqqat ikiaroonartumik eqqussuinermi atorneqarnerulissasut. Akileraartarnermut oqartussaasut paasissutissiissutigaat, sulianik ikiaroonartumik eqqussuinermut tunngassuteqartunik, meeqqanit 18-it inorlugit ukioqartunit akuuffigineqarsimasunik siumiusoqarsimanngitsoq.

Naalakkersuisut naliliipput ukiutigut killiliussaq, taamaaliornissaq peqqinnissaq eqqarsaatigalugu inassutiginaangikkaluarpulluunniit, eqqartuunneqarsinnaasut ukiuannut killiliussamit appasinnerutinneqartariaqanngitsoq. Naalakkersuisut tassunga atatillugu tikkuarpaat, timikkut qinnguartaartinnissamut akuersinerup kingunerisinnaasai meeqqanut inuusuttunullu 15-it inorlugit ukiulinnut tamakkiisumik paasissallugit ajornakusoorsinnaasooq.

### **3.6. Aningaasaqarnikkut sunniutit – Timimik scannerineq**

Inatsimmut nassuiaatini nalinginnaasuni pisortanut aningaasaqarnikkut allaffissornikkullu kingunerisassat pillugit Naalakkersuisut paasissutissiipput timimut scannerummik pissarsinermi aningaasartuutit 800.000 kr-it missaarlugit annertussuseqarnissaat naatsorsuutigineqartoq.

Danmarkimi ilanngaaserisoqarnermut akileraartarnermullu oqartussaasut Aarhusip, Ålborgip kiisalu Billundip timmisartoqarfiinut røntgen atorlugu scannerinik, inunnillu ikiaroonartumik timip sulluinut toqqorsillutik eqqusseriartunik qulaajaasinnaasunik pisinissartik aalajangiussimavaat. Scannerit taakku pingasut 5 mio. kr-it missaannik akeqarnissaat ilimagineqarpoq, tassa ataatsimut 1,6 mio kr-it.

Tamanna tunngavigalugu Danmarkimi ilanngaaserisoqarnermut akileraartarnermullu aqutsisoqarfiup timimut scannerummut ataatsimut akiliutigisassatut ilimagisaanut naleqqiullugu pissarsiariniakkap affaannarmik akeqartussaananik ilimaginninnerminnut Naalakkersuisut tunngavigisaat pillugit Inatsisinut Ataatsimiititaliap Naalakkersuisut aperivai.

Naalakkersuisut ima akissuteqarput:

*Inunnik scannerutit pisiarineranni qanoq akeqarnissaannut tunngatillugu Naalakker-suisut naatsorsuutigisaat inatsisissatut siunnersuutip suliarineqarneranut atatillugu missingiinerugallartunik tunngaveqarpoq, tassani scannerutit assigiinngitsut eqqarsaataasimallutik. Kingusinnerusukkut, aamma lu suliap Danmarkimi SKAT peqatigalugu ingerlanneqartup nanginnerani neqeroorutit aalajangersimasut suliarineqarmata naatsorsuutigisap nalileqqinnissaa pisariaqarsimavoq.*

Inatsisinut Ataatsimiititaliap akissut imatut paasivaa inatsimmut nassuiaatini nalinginnaasuni pisortanut aningaasaqarnikkut allaffissornikkullu kingunerisassat pillugit immikkoortoq piviusorsiorlutut isigineqarsinnaajunnaartoq.

Inatsisinut Ataatsimiititaliap tamanna pillugu apeqquteqarsimanngikkaluarpat Naalackersuisut namminneq piumassutsiminnik Inatsisinut Ataatsimiititaliamut /Inatsisartunut paasissutissiisimassagaluarnerat Inatsisinut Ataatsimiititaliap ilimagisariaqarpaa, taamaaliornermikkut Inatsisartut aalajangiinissaminut nutartikkamik eqqortumillu tunngavissaqarnissaat isumannaarlugu.

### **3.7. Aningaasat tigorianaannartut nassiussat**

Malittarisassat atuuttut (nioqqutissanik eqqussuineq annissuinerlu pillugit Inatsisartut inatsisaanni § 30, imm. 4) inuit Kalaallit Nunaannut/nnit angalasut 15.000 euronik amerlanerusunilluunniit nassataqartut tamanna pillugu akileraaruseriffimmut paasissutissiinissaannut pisussaaffilerpai. Inunnut suliffeqarfimmut il.il. Kalaallit Nunaata avataanut 15.000 euronik amerlanerusunilluunniit nassiussisunut nunamilluunniit Kalaallit Nunaata avataaneersumit nassiussarsisunut tunngatillugu, taakkununga tamanna pillugu akileraaruseriffimmut paasissutissiinissamut pisussaaffik taamaattoq Inatsisissatut siunnersuummik eqqunneqassaaq.

15.000 euro ullutsinni 110.000 kr-it missaannik naleqarput. Aningaasat amerlassusissaannut killiliussanik assinginik aningaasanik peqquserlulluni "malunnarunnaarsaasarnermut" inatsimmi aalajangersagaqarpoq.

Pinerluuteqarluni aningaasarsianik (assersuutigalugu hashimik tuniniaanermit) pinerluuteqarnermiluunniit atugassanik (assersuutigalugu hashimik pisinissamut) nuussisinnaanerup pinaveersimatinnissaa malittarisassani atuuttuni § 30, imm. 4-mik siunnersuutigineqartumilu § 30, imm. 5-imik siunertaavoq. Aningaasat tigorianaannaat 100.000 kr-init amerlanerusut, inuit angalasut nalinginnaasumik nassatarisinnaasaannit amerlanerungaatsiartutut isummerfigineqarsinnaapput, aningaaseriviillu saniatigut aningaasanik taamak amerlatigisunik nassiussatut nassitsisinnaasut amerlavallaarunangillat.

Tamanna tunngavigalugu Inatsisinut Ataatsimiititaliap Naalackersuisut aperinikuuvai, aningaasanut nassatarisinnaasanut 15.000 euronut killiliineq sumik tunngaveqarnersoq, taassuminngalu appasinnerusumut killiliineq pinerlutsaaliuinnermut iluaqutaanerussannginnerunersooq.

Aningaasanut killiliussaq 15.000 euro aningaasanut tigorianaannartut, inunnit Kalaallit Nunaannut tikittunit tassanngaanniillu aallartunit nassarneqarsinnaasunut killiliussaasoq 15.000 euro naapertorlugu aajangersagaasoq Naalackersuisut akissutiminni oqaatigaat.

Killiliussamik appaanerup pinerluttaaliuinissamut iluaqutaasinnaanissaa Naalackersuisut assortorsinnaangilaat. Iianngaaserinermulli oqartussaasut aningaasanik tigorianaannarnik nassatanik misiliilluni misissuisinnaanerat aalajangersakkami periarfissineqarpoq. Pinerluttulerinermik inatsimmik unioqquutisisoqarneranik pasitsaassisoqarnerani suliassaq paasiniaaffigisassanngorlugu politiinut ingerlateqqinneqassaaq, aningaasat amerlassusiat apeqquataatinnagu.

#### **4. Inatsisinut Ataatsimiititaliap oqaaseqaatai**

Suinnersuutip akitsuutinik akiliinngitsoortarnernik nakkutilliinermut hashimillu eqqussuinermit akiuiniarneq nukittorsassagaa ilimagisariaqarpoq, tamanna pitsaasuusutut Inatsisinut Ataatsimiititaliamit nalilerneqarpoq.

Naalackersuisut allannguutissatut siunnersuutaannut tunngatillugu, ataatsimiititaliap maluginiarpaa, tamanna periutsumik atuuttumik timitaliinerusooq, tamannalu umiarsualivimmik ingerlatsinermi ammanerulersitsinerup pisariaqartinneqarsimalerneranik Naalackersuisunit isumaqarfigineqartoq, tassungalu ilaasoq Nuummi nutaamik umiarsualuiviliornissamik ingerlatseqatigiiffimmuut pilersaarutaasut. Kiisalu ataatsimiititaliap maluginiarpaa, nakkutilliinissamut siunertalimmik inimik atugassiinissamut umiarsualivinnit (aamma mittarfinnit) aningaasartuutit akilerneqartussat killeqassasut Naalackersuisut nalileraat.

Inatsisinut Ataatsimiititaliaq tamanna tunngavigalugu Naalackersuisut allannguutissatut siunnersuutaannut tapersiisinnaavoq.

Taamaattorli ataatsimiititaliap maluginiarpaa allannguutissatut siunnersuutip sunniutissaa tusarniaanermut peqataasunit arlalinnit isumakuluutigineqarmat. Tamanna tunngavigalugu ataatsimiititaliaq isumaqarpoq Akileraartarnermut Aqutsisoqarfiup atortussanut akileraartarnermut ingerlatsiviup misissuineranut taamaallaat atorneqartunut aningaasartuutit akileraartarnermut ingerlatsivimmit namminermit akilerneqartussaaneerit inatsisip oqaasertalerneqarneratigut iluaqutaasumik erseqqissarneqarsinnaasoq (§32 a, imm. 2). Ataatsimiititaliaq tamanna naapertorlugu pingajussaaneerinninnermut allannguutissatut siunnersuummik saqqummiussivoq.

Aammattaq ataatsimiititaliaq isumaqarpoq aningaasanut Kalaallit Nunaanniit Kalaallillu Nunaannut nassiussanut 15.000 euronut qaffasinnerpasaffiliineq pisariaqatinneqartoq sinnerlugu qaffasinaagaasoq. Ataatsimiititaliaq pingajussaaneerinninnermut allannguutissatut siunnersuummik saqqummiussivoq, taamaalilluni aningaasat nassiunneqarsinnaasut 50.000 kr-inut qaffasinnerpaaffilerlugit. Kalaallit Nunaanniit Kalaallillu Nunaannut angalanermut

tunngatillugu aningaasanut eqqunneqarsinnaasunut anninneqarsinnaasunullu killiliussamut atuuttumut naapertuuppoq.

Kiisalu ataatsimiititaliap maluginiarpaa, inatsisissatut siunnersuutip UPA 2015-imi akuersissutigineqarnissaa ilimagalugu inatsisissatut siunnersuutip atuutilerfissaanut ulluliilluni aalajangersaasoqarsimasoq. Taamaamat inatsisissatut siunnersuutip atuutlernissaanut ulluliussap allanngortinneqarnissaa pisariaqarpoq. Inatsisinut Ataatsimiititaliaq pingajussaaneerinninnermut allannguutissatut siunnersuummik saqqummiussivoq, taamaalilluni inatsit aatsaat 1. januar 2016-imi atuutiertussanngorlugu.

## **5. Inatsisinut Ataatsimiititaliap inassuteqaataa**

Ataatsimiititaliap isumaqatigiittup allannguutissatut siunnersuutip akuersissutigineqarnissaa inassutigaa, taamaattorli pingajussaaneerinninnissamut allannguutissatut siunnersuummik saqqummiussilluni.

Inatsisinut Ataatsimiititaliap taamatut oqaaseqarluni siunnersuut aappassaaniigassanngortippaa.

---

Anders Olsen  
Siulittaasoq  
*Siumut*

---

Iddimangiiu Bianco  
*Inuit Ataqatigiit*

---

Laura Tåunâjik  
*Siumut*

---

Muté Bourup Egede  
*Inuit Ataqatigiit*

---

Michael Rosing  
*Demokraatit*